

Gavilan a yena y no lo wordo uza mas

Sabanilla Abao lo bira posibel dump

ORANJESTAD – Manera cu BON DIA ARUBA a publica riba dia 7 di februari ultimo, un di e posibel terenonan pa bira e proximo dump lo tabata un tereno na Moko. Sinembargo, den un combersacion breve cu tabata tin cu vocero di Serlimar, Sr. Lionel Croes, esaki a wordo descarta y awor tin bista riba un tereno na Sabanilla Abao. Un di tres opcion ta pariba di brug.

Gavilan a yena y no lo wordo uza mas. Minister di Medio Ambiente y Economia, Sr. Mike de Meza, a comenta cu tur loka ta sushi di construccion y di agricultura, ta bayendo Parkietenbos.

Exigencia Segun minister de Meza, gobierno tabata ocupa cu un lista di tur e posibilidad y a haya tres cu ta cumpli cu e exigencianan rekeri, manera grandura, ubicacion y no mester ta un molester den comunidad. Si tur cos ta bon, lo yega na final di uno. Ta papiando riba e ultimo pidanan y e ora ey lo anuncia den algun dia, caminda cua lo ta e siguiente luga cu lo bay wordo uza. Esaki ta bay riba e landsverordering, e ley cu tin cu bay parlamento pa por bay ehecuta e proyecto di e “Waste to Energy” na Parkietenbos cu lo yuda den reduccion di e tipo di desperdicionan aki.

Yena cu desperdicio natural

No tin cu lubida locual cu a wordo manda Gavilan no ta e desperdicio di



cas of industrial. E ta puro santo, beton, cement, matanan di cultivacion. Ta parti di naturalesa, segun de Meza. Automaticamente unabes cu caba cu e proyecto grandi, e Waste to Energy, e ora lo por bay na tur e luganan ey. Hopi di e luganan cu yena nan, ta dempel y cera nan, nan ta keda bon. Nan no tin un sushi cu kimico cu por ta dañino pa medio ambiente. Nan ta wordo tapa cu e tipo di sushi. Rond di mundo ora cu yena un landfill, ta yen'e cu tipo di materialnan ey cu no ta haci daño na medio ambiente.

Lista di posibel tereno

Segun de Meza, a traha un lista pa mira cua ta e posibel tereno, tanto di gobierno como esunnan priva. Te cu asina leu, e mandatario a splica, cu e terenonan cu a wak riba dje ta priva, cu a cumpli cu e exigencianan rekeri y na e momentonan aki ta wordo evalua.

Te cu proximo aviso

Gavilan lo keda cera, manera a wordo

mentiona anteriormente. Unico cos cu tin awor aki ta Parkietenbos. Minister di Infraestructura, segun ley, ta indica cu un luga lo wordo nombra temporalmente pa deposito di desperdicionan di construccion y sushinan agricola. Pa loka ta desperdicionan venenoso y domestico, lo bay direccion Parkietenbos, de Meza a splica.

Uza pa explosion

Gavilan tabata wordo uza te na ultimo como un tereno pa rementa explosivo, cual sigur ta un peligro pa esunnan cu ta biba den e zona. Ainda por corda no mucho tempo pasa, durante luna di februari di aña pasa, tabata tin un explosion asina grandi, cu por a wordo scucha den varios districto na Aruba y a causa morto di un persona, heridando varios otro. Mañan den oranan di mainta lo bay tin reunion cu ministernan de Meza y Sevinger, pa asina haya sa e decision definitivo cua lo ta e tereno cu lo bay wordo uza pa ta e proximo dump.